

Istorgia e svilup dal viandar en il Grischun

La Terra Grischuna mussa aspects multifars

■ (anr/gc) En l'editorial da la novissima Terra Grischuna (3/2016) – spezializada sin la natira, cultura e temp liber – vegn rendi attent che quella comparia senza interrupziun dapi 75 onns. Per la 10. giada vegn er il Premi Terra Grischuna scrit ora. Questa revista-ambassadura dal Grischun po pia festivar quest onn in giubileum dubel. Il tema principal è deditgà questa giada al viandar, quai ch'è per pli che 50% dals Svizzers e da las Svizras l'occupaziun preferida durant il temp liber. E latiers datti en il Grischun bleras pussaivladads cun ses 11 000 km vias marcadadas che mainan tras 150 valladas, sper 600 lais, sin 1000 culms e pizs e sper atgnadads culturalas vi. La Terra Grischuna mussa en pled e maletg quant che quest paradys da viandar ha da porscher sin numerusas rutas. Gist avant 60 onns è era la Cuminanza grischuna per vias e sendas vegnida fundada. Ella è s'occupada intensivamain da la planisaziun e signalisaziun da vias e sendas adattadas per viandar.

Mussà vegn il lung svilup e las grondas midadas tar il viandar che han la finala purtà il turissem. Il Grischun porscha sin pitschen spazi ina enorma ritgezza da lieus natirals e na main era da cuntradas culturalas. Allegada vegn ina publicaziun davart excursiuns cultur-istoricas en il Grischun. E sez l'electronica porta pertutgant viandar avantatgs, als quals ins na vules betg renunziar. Oz dovran ins era la dretga vestgadira en il temp liber ed i vegn descrit co quella moda è sa midada. Plirs viandants han fatg excursiuns e retegnì en maletgs numeruss aspects da las cuntradas. Els èn uschè da dir daventads artists ambulants. – I deva era viadis da speranza tras persecutads sur ils cunfins grischuns per sa salvar. Na adina èn quels reussids ed han manà enavos a la mort.

Premi Terra Grischuna

Per il Premi da la Terra Grischuna – en l'importo da 5000 francs – vegnan pro-



Il frontispizi da la nova Terra Grischuna.

MAD

ponids quest onn *Brigitta Michael-Joos*, Cuira, che presidescha dapi blers onns la Societad grischuna da rosas. Alur *Hans Christian Bernet*, Claustra, visuinari ed iniziand da l'Unìun «Evenimentar cun cor» e sco terz l'enconuscent musicist *Domenic Janett*, da Tschlin a Stugl sur Bravuogn, ch'è medemamain purtader dal Premi da cultura dal chantun Grischun quest onn. Lecturs e lecturas da la TG pon decider tgi che va cun la plima.

Lisa Gensetter, da Tavau, ha lavurà savens era per la Terra Grischuna. Sia ierta fotografica vegn registrada tras la Fundaziun grischuna per fotos e l'ovra mussada en ina exposiziun. A la fin da zercladur vegn il nov edifiziu annex dal Museum d'art dal Grischun a Cuira avert. Sia realisaziun è stada pussaivla be grazia ad ina donaziun generusa d'in mecen turitgais. – Quai ed anc bler auter pon ins leger e contemplar en quella bella revista davart la terra grischuna.